

Den Theater als gesellschaftleche Phänomen a pädagogescht Instrument

D'Wanterméint sinn iwver Land Theaterméint. Vill Veräiner féieren nei an al Stécker op an ameséieren e breede Public. Theater spillen ass hei zu Lëtzebuerg Kult. Nieft der professioneller Zeen gëtt et eng Hellewull vu lokalen Amateuren, déi sech beméien sprëtzeg Stécker op d'Bühn ze zauberen. Vun der Musel iwver de Minette bis rop an d'Éislek gëtt flächendeckend Theater gespilt. De Réidener Kanton ass am Norde besonnesch äifreg. Och an der Nordspëtzt grad wéi am Sauerdall fanne sech Jonk an Al zesummen fir Theaterstécker, Sketcher a Revüen ze spillen.

An der Moud sinn och déi grouss Fräilichtspektakelen. Ech denken do virun allem u Grousbuss, Buerschent, Kielen oder un Déifferdeng, déi d'lescht Jor en aalt Stéck gespilt hunn, „De wëlle Grof“, eng Geschicht, déi an de 50er Joren am Kischpelt uropgefouert gouf. 2009 ass och nees en historesche Fräilichtspektakel virum Ierpeldenger Schlass, matzen am Dikricher Kanton.

Wann Amateuren Theater spillen, da wëlle si d'Leit aus hirer Géigend fir e puer Stonnen aus



dem Alldag eraushuelen a si an eng aner Welt féieren an ënner Ëmstänn mat hirer eegener Geschicht konfrontéieren. Am Géigesaz zur Télé féiert den Theater d'Leit zesummen. De sozialen Impakt ass guer net z'ënnerschätzen. Dat gëllt och a grad fir déi, déi matspillen.

Wéi mir 2005 am Ierpeldenger Schlasspark ee grouss Fräilichtspektakel opgefouert hunn, louchen sech d'Akteuren, jonker

an eelerer, méi wéi eng Kéier an den Äerm. Et war sécherlech eng äusserst ustrengend Entreprise. Fir datt et e Succès konnt ginn, hunn d'Leit missen zesummenhalen. Momenter vu Freed a Begeeschterung hu sech ofgewieselt mat Phase vun Ustrengung an haarder Aarbecht. Iwver allem stoung awer d'Solidaritéit. Bei sou groussen Eventer ass een op deen aneren ugewisen. A wann herno alles klappt, dann ass dat fir d'Akteuren en immenst Gefill vun Zefriddenheet.

Dat selwecht erliewen déi Jonk am Jugend- oder Schülertheater. Ech denken do un den

Dikricher Kolléisch, deen zanter Joren Inszenéierung vum usprochsvolle Stécker opféiert. De Schüler erlieft d'Literatur an enger aktiver Dimensioun. Vill Hänn sinn néideg fir datt et ee Ganzt gëtt. Vum Plakat, Backstage, iwver d'Bühnebild bis hin zur Kommunikatioun, alles wëll programméiert ginn. Dobäi léiere grad déi Jonk, wéi een zesummestoe muss fir datt en Ambiente entsteet, deen op de Public iwwerspréngt.

Grad an eise Schoulen ass d'Theaterspillen eng pertinent Geleeënheet fir Jonker op dat gesellschaftleche Liewe virzubereeden. Si spillen net nëmmen eng Roll, mä droen och Verantwortung fir dat Ganzt, musse sech disziplinéieren, daitlech schwätzen, sech konzentréieren léieren, Gefiller weisen. Den Theater hëlleft sou, sozial Reflexer bei deene Jonken z'entwéckelen. Do ass weder Plaz fir Egoismus nach fir Indifferenz. Dat ass och den Ënnerschied zur Weltbühn, déi eis allze dacks e schlechten Theater bitt, Dramen an Tragedien, déi net an zwou Stonnen eriwver sinn an Episoden iwver déi kee laache kann.

› André Bauler